

石屋清珙禅师塔铭

前四明延寿禅寺沙门 元旭 撰

师，讳清珙，字石屋，苏之常熟人也。俗姓温，母刘氏，生之夕，有异光，实宋咸淳八年壬申也。及长，依本州兴教崇福寺僧永惟出家。二十祝发。越三年受具。

一日，有僧杖笠过门，师问之。僧曰：“吾今登天目，见高峰和尚。汝可偕行否？”师欣然与之偕行。

见峰，峰问：“汝为何来？”师曰：“欲求大法。”峰曰：“大法岂易求哉！须燃指香可也。”师曰：“某今日亲见和尚，大法岂有隐乎？”峰嘿弃之，授“万法归一”之语。服勤三年，大事未明，忽辞他行。峰曰：“温有瞎驴，淮有及庵，宜往见之。”

至建阳西峰，见及庵。庵问：“何来？”师曰：“天目。”庵曰：“有何指示？”师曰：“万法归一。”庵曰：“汝作么生会？”石无语。庵曰：“此是死句。什么害热病的，教汝什么？”师拜求指示。庵曰：“有佛处不得住，无佛处急走过，意旨如何？”师答不契。庵曰：“这个亦是死句。”师不觉汗下。

后入室，再理前话诘之。师答曰：“上马见路。”庵呵曰：“在此六年，犹作这个见解。”师发愤弃去。

途中，忽举首，见风亭，豁然有省。回语庵曰：“有佛处不得住，也是死句，无佛处急走过，也是死句。某今日会得活句了也。”庵曰：“汝作么生会。”师曰：“清明时节雨初晴，黄莺枝上分明语。”庵颌之。久乃辞去。庵送之门，嘱曰：“以后与汝同龕。”

未几，庵迁湖之道场，师再参。次命典藏钥。庵曾与众言曰“此子乃法海中透网金鳞也。”一众刮目以视。

后灵隐悦堂闾公会中居第二座。遂罢参，登霞雾山卓庵，名曰天湖。道洽缁素，户履骈臻，伏腊所须，不求自至。凡樵蔬之役，皆躬自为之，有古德之风。禅暇，喜作山居吟，传者颇多。师于此山，有终焉之志。

俄而嘉禾当湖，新创福源禅刹，以师之名闻，诸广教驰檄，敦请为第二代住持。师坚卧不起，或者劝之曰：“夫沙门者，当以弘法为重任。闲居独善，何足言哉！”于是翻然而起，大开炉鞴，锻炼学者。谈者以谓真能起及庵之家者也。

居七年，以老引退，复归天湖。至正间，朝廷闻师名，降香币以旌异。皇后赐金襴衣，人皆荣之，师淡如也。

至正壬辰秋七月廿有一日示微疾，阅二日，中夜与众诀。其徒请曰：“和尚后事如何？”遂索笔书偈曰：

“青山不著臭尸骸，死了何须掘土埋。

顾我也无三昧火，光前绝后一堆柴。”

掷笔而逝。闾维，舍利五色璨然，不知其数。其徒收其灵骨舍利，塔于天湖之原。以及庵之塔配之，示不忘同龕，师之意也。寿八十有一，腊五十有四。

有弟子愚太古者，高丽人也，亲得师旨，说偈印可，有“金鳞上直钩”之句。其王，以国师之号尊之。闻师道行，意甚倾渴。表达朝廷，诏谥佛慈慧照禅师。移文江淞，请净慈平山林公，躬入天湖，取师舍利馆伴归国。平山与师为同参，

皆凭公之本意也。师之上堂法语，山居诗颂，其徒至柔刊行于世，且以师之行状，征予铭之。予昔见师于福源，瞿然其形，道韵可掬，今已四十余年矣。因感慨而为之铭。铭曰：

西来直指，教外别传。
惟上根者，乃可得焉。
传亦无传，得亦无得。
如太虚空，荡焉罔极。
卷卷石屋，心如死灰。
豁然顿悟，火里莲开。
惠朗之孙，及庵之子。
源清流长，根茂实遂。
迹留霞雾，名落湖江。
争先快睹，景星凤凰。
入灭至今，几三十□。
双塔岿然，清风未已。